

四庫全書

集部

欽定四庫全書

止齋集卷十五

宋 陳傅良 撰

外制

自紹熙五年八月以後

皇后初冊封贈三代

曾祖資政殿學士贈少師韓小胄贈太師

敕慶歷嘉祐之盛萬世帝王基業也而弼亮之功惟爾
先正燕及奕葉嗣有象賢宜爾子孫與國無極具官某
踐修厥猷益有令聞夷險一節見於艱難高宗圖舊晉

諸樞筦而再入穹廬將命不辱奠安宗社天下賴之然
位不稱德有識同嘆爰有曾孫來儷宸極朕嘗以國史
次韓之事諭諸中宮以似以續爰因追錫晉陟師垣非
以為生蓋禮之稱可

曾祖母秦國夫人王氏贈魯國夫人魯國夫
人文氏贈闕國夫人

敕維昔忠獻身修家齊被于後昆將相三葉克對前人
皆有內助具位某氏夙以淑德嬪于相門輔佐君子繼

世承弼永惟鵲巢國君積行累功夫人起家與享休顯而名南推本以為德足以配非偶然也是宜儲休載生賢后以綿國祚以大家聲被封于秦亦既從爵申錫于魯蓋取諸頌使與僖公令母千載相望豈不榮哉可

祖承議郎贈中奉大夫韓協贈太傅

敕朕聞燕齊之祀與周並傳漢之封君爰及苗裔矧惟韓氏之勲度越自昔於是僅三世耳而胡浸微天命弗僭其殆再昌乎具官某於衛國為裔孫於少師子也學

足以克家而宦不達才足以用世而懷不得試即其靖
退足見所存集善為祥積於閨閭載篤其慶后所自生
夫屈於名者享其實不獲乎其身者遺其後晉班公傳
誰曰不宜雖曰緣恩亦足用勸可

祖母令人馮氏贈闕國夫人

敕周人之頌任姒曰是有摯仲氏也是有莘長女也盖
本其所自出必名邦大族而豈無故之福母儀天下乎
其位某氏身為少師婦以奉魏祀於是浸微而不病其

夫子之不過敬共朝夕世守弗違餘慶流光萃于今后
詩不云乎君子萬年景命有僕其僕維何釐爾女士言
周之盛天命附著使生淑媛以為之妃則我式克至于
今休蓋祖烈也亦天意也新封美號為之報本豈惟忠
獻將吾祖宗實寵嘉之可

父朝奉大夫提舉佑神觀韓同卿授揚州觀
察使

敕詩人之誦賢后必曰是有摯仲氏也是有莘長子也

蓋本所自來必君侯世家儲休積慶而豈一日之積哉
具官某魏忠獻公之裔孫也踐脩厥猷益自謹飭嘗試
以事茂於材猷是生淑媛來配潛邸肆朕嗣服正名長
秋在詩之既醉曰君子萬年景命有僕其僕維何釐爾
女士釐爾女士從以孫子言有士行之女以為之配皆
天意也維爾先正功在社稷德在蒼生以克及此豈非
天乎戚里故事必在右選爰解郡綬改畀廉車宜益靖
共以綏寵祿可

母闕氏贈闕國夫人

敕朕誦周南至於葛覃后妃躬儉節用服澣濯之衣皆
其母家實為之未嘗不忻慕也具位某氏吾后母也以
吾后作配朱邸共蘋蘩之蒞正位中宮獻種稔之種親
事煩縟曾無吝驕則其素教豈一日之積哉夫區區侯
邦而渭陽之思闕宮之頌必及其母況以后德流化天
下則推尊母氏可無茂恩且與之共隱約於鷄鳴擲盥
之時而不與之共休顯於象服委蛇之際揆之經誼本

之人情皆非稱也。胙以上國為君夫人，非徒示私亦足
用勸可。

少保觀文殿大學士充醴泉觀使益國公周必
大登極恩贈三代。

曾祖故朝奉郎贈太師潭國公衍加封秦國
公。

敕朕嗣守丕圖永懷元老而訪落不與於廟謀也。嘗告
在廷晉爵亞傅則所以推本世系以宏賁其先正之祧。

庸可後乎具官某曾祖某躬行對於古人宦學聞於當世位不稱德士論惜之夫屈於名者享其實不獲其身者遺其後是宜燕及曾孫蔚為名臣徧儀三事光輔兩朝也則追錄其積行之勤增華其種德之報大啟土宇晉封三秦非以為生蓋禮之稱可

曾祖母潭國夫人郭氏贈秦國夫人

敕周之公孤並祀五廟以君夫人祔焉而世世享具官某曾祖母某氏來自名門作配君子躬備勤勞以詔婦

子而生無從爵之榮歿不得與共牢之報天命弗僭是生曾孫為吾輔臣弼亮奕世朕循周制寵綏爾夫誰其助之劬躬燾後爰因舊號俾即新封用賁幽宅尚克永世可

祖故朝散大夫贈太師潭國公詵封秦國公
敕成王之雅曰周王壽考遐不作人蓋歸美文王得人
所由來之遠也具官某故祖具官某世濟其美蔚為名
臣然而德業藏於身聲聞流於時官不過五品而位止

郎舍也唯是一經之教施于曾孫我高宗取之壽皇用
之天下又安於是三紀肆朕嗣服獲蒙餘休非所由來
者遠歟疇勞報本茲惟其時襲封於秦實應經誼可

祖母

敕朕純用周政廣恩錫類以褒大吾輔臣之世則燕及
閨門可無追命具官某故祖母某氏儀于前人益謹內
則載篤其慶萃于聞孫方周盛時公侯皆君子也而風
人本之衽席以是為德在鵲巢功在采蘋也我儀爾祖

克大其後用見家政庶幾召南從爵大邦以勸命婦可

父

敕周公拜前魯公拜後父子休顯著於春秋胡我元臣
遺恨禰廟此憫章之所由起歟具官某故父某襲美于
家學振聲于世科而雅不善官老於博士功業不見於
世而文辭但以詔後人也然而過庭之訓挿架之書淵
淳駿發見於賢子經文緯武天下賴之詩不云乎維其
有之是以似之儻微申錫非所以為義方勸也爰考古

誼襲爵為公庶幾周魯袞舄相望不亦榮乎可

母

敕朕既本之經誼為公卿崇報禰廟以侈移忠之報則
母氏與享使之匹休亦古道也具官某故母具位某氏
恩斯勤斯鞠我良弼譽在薦紳功在清廟夫嘗同其夫
處約於燈火之初而不及同其子處樂於簪裾之後此
吾大臣為之補南陔廢蓼莪也象服之弗被魚軒之弗
乘有此寵綏足慰居住配食二姑以奉闕祀其明享哉

因其舊號益以新封雖曰邦彛亦足用勸可

觀文殿學士宣奉大夫致仕李彥頴登極恩轉

光祿大夫

敕朕以眇躬嗣膺丕緒闕焉懼無以紹列聖之休訪落
求助庶幾周成公卿大夫其將何以佐朕也具官某歷
事三朝蔚為元老夫致位丞弼方倚為相而不為苟同
竟於謝事昔蕭望之意輕丞相而位不過御史大夫以
為身計則不工以為道誼計多見其可尚也肆予紹服

久矣里居以卿忠諒則敬之之頌七月公劉之風雅能
忘於心乎爰因舊章序進厥秩亦示永懷以冀樂告可
資政殿大學士通奉大夫知潭州王藺登極恩

轉正議大夫

敕朕以眇躬嗣膺丕緒闕焉懼無以紹列聖之休訪落
求助庶幾周成公卿大夫其將何以佐朕也具官某歷
事兩朝孤立一意方其受重華之託而光輔上皇始初
之政忠言讜論不自同於衆人盖天下嘆其難長慮卻

顧不苟安於一時又天下服其遠也肆於紹休適分帥
間以卿忠諒則敬之之頌七月公劉之風雅能忘於心
乎爰因舊章序進厥秩式昭永懷亦冀樂告可

資政殿大學士通議大夫提舉臨安府洞霄宮
黃洽登極恩轉通奉大夫

敕朕以眇躬嗣膺丕緒闕焉懼無以紹列聖之休訪落
求助庶幾周成公卿大夫其將何以佐朕也具官某歷
事兩朝蔚為故老方淳熙之季年天下晏然橐弓橐矢

簡在宥府不動聲氣而強本折衝之功自不可掩至於
行藏庶幾前朝孫文懿張退傳之倫矣肆予紹服均佚
外祠以卿忠諒則敬之之頌七月公劉之風雅能忘於
心乎爰因舊章序進厥秩亦示永懷以冀樂告可

朝散郎煥章閣待制兼侍講朱熹登極恩轉朝
請郎

敕朕以眇躬嗣膺丕緒闕焉懼無以紹列聖之休訪落
求助庶幾周成子大夫其將何以佐朕也具官某學先

聖之道而明於當世之務三仕三已義不苟合天下高之蓋累朝之所嘉嘆而不忘也長沙謀帥強為時起肆予初政式遘其歸處之次對於以勸講朕將虛已聽焉爰因大賚敘進厥秩雖曰舊章亦朕美意可

權戶部侍郎梁總登極恩轉官

敕朕以眇躬嗣膺丕緒闕焉懼無以紹列聖之休訪落求助庶幾周成卿大夫其將何以佐朕也具官某方以民譽簡在從班肆予初政日月獻納而不記成王踐阼

七月在風公劉在雅敬之在頌皆一時耆俊為之乎自
今以始朕日望之爰因大賚序進厥秩雖曰舊章亦冀
樂告可

在外侍從登極恩贈父

敕朕方訪落求助自公卿大夫各加地進律矣則推本
其世而褒大其家雖禮未有可不以義起乎具官某故
父具官某生有種德之勞而位不稱歿享義方之報而
何其流之長也以爾某論思獻納著節兩朝肆予嗣服

心在王室非忠孝之傳有自来歟增賁禰廟追錫崇階
雖曰舊章亦以示勸可

在外侍從登極恩贈母

敕朕既本之經誼為卿大夫崇建禰廟以侈移忠之報
則母氏與享以次申錫使之匹休亦古道也具官某母
某氏来自名門作配君子是生賢嗣樹為從臣夫鷄鳴
警戒之道不篤則過庭之訓不嚴蘋藻不共則甘旨不
謹爾某何以能移孝為忠也因其舊號易以新封雖曰

邦彞亦足用勸可

在外宰執登極恩贈妻

敕昔成王踐阼世修忠厚其詩曰孝子不匱永錫爾類
其類維何室家之壺蓋施及臣子不但其身而亦被于
室家具官某妻某氏克相夫子樹為宗工積行累勞致
位孤棘惟周人克廣孝思慰滿梱內肆予嗣服繫爾臣
隣多助之至則為之推恩燕及閨門雖祔于姑亦胙大
國非苟為私盖周道也可

在外侍從登極恩封妻

敕朕觀二南之詩關雎為皇后鵲巢采蘋為君大夫妻
作也則正家之化君臣一體然則力定長秋之位而可
無以為爾內勸乎其官某妻某氏以爾夫子嘗為從臣
獻納論思夙夜匪懈則入朝有鷄鳴之戒退食有羔羊
之德非爾之助申錫命書晉之美號則在初政豈曰不
宜可

煥章閣學士宣奉大夫提舉隆興府玉隆萬壽

宮洪邁弟朝散大夫新知陝州遂登極恩母楚
國夫人沈氏加贈魏國夫人

敕朕訪落求助自卿大夫皆加地進律矣士有能尊禰
廟至官一品斯足以報本矣而母氏與享為君夫人猶
視列國宜並褒崇使之匹美具官某母具位某氏聿自
名門作配君子遭時不淑萬里違離而勉正勸義庶幾
風人所誦汝水之墳南山之側也天命弗僭宜享後福
肆予踐阼益大爾封晉之魏邦庸示光寵庶克用勸豈

徒舊章可

右丞相趙汝愚初拜贈三代并妻七月丙子拜

曾祖

闕二

贈太傅

敕昔周公位冢宰成王為之作魯廟宣王中興則命召
虎亦有秬鬯圭瓚以告文人我相同姓蓋周道也推本
其先以致美報可無褒典以應經誼具官某曾祖具官
某躬行對於古人譽處聞於公族然夷攷其世於漢恭
憲王為裔孫於建國公為嗣子蓋屬未䟽也而僅綴道

遙之班以其靖退足見所存夫屈於名者申於實不獲
乎其身者遺其後是生曾孫迄為上相則追錄其積行
之勤增華其種德之報朕敢忘周道乎晉陞帝傳於禮
固宜可

曾祖母闕氏贈申國夫人

敕昔周盛時公侯皆君子也而周召二南本之衽席以
是為內助之賢德在鵲巢功在采蘋也具官某曾祖母
具位某氏出於名門作配公姓身為建國婦以奉漢祀

於是浸微而不病其夫子之不遇世無風人無所著見
爰及魯孫篤生賢哲然則取漢上之詩以名其國為君
夫人俾世世享亦二南之意歟可

祖闕二贈太傅

字

敕朕既質之六藝疇勞報本以褒吾相臣之祧則嗣有
令德燕于後昆申命匹休庶幾周召並建五廟不亦宜
乎具官某祖具官某以王公之胄而有學士大夫之習
非無富貴之階而宦不達也集善為祥聿生孝子載篤

其慶發於聞孫詩不云乎藝之榛栗椅桐梓漆爰伐琴瑟忠孝之門豈一日之積哉我儀圖之宜爵公傳爰錫命書以賁幽壤可

祖母晁氏贈闕國夫人

敕詩人之頌婦德必本其家世曰是齊侯之子東宮之妹也是汾王之甥蹶父之子也具官某祖母具位晁氏蓋濟陽之晁也濟北諸晁族望甚偉以其父兄子弟風流儒雅名滿天下則爾以閨門之秀來嬪吉人克教其

子得名篤行至於奕葉遂間兩社揆之風雅無愧在昔
大邦美號饗此後福非以為生蓋德之稱可

父

闕二

贈溫國公

敕朕聞之周以魯孝公訓國而漢亦謂劉德謹重使為
太常以率宗室赫然著于史傳豈非以帝繫之餘世祿
之及而篤行者難其人乎具官某父具官某踐修厥猷
益自力學被服造次必於仁義而事親之孝庶幾曾閔
縉紳先生為之起敬卒於小官法不應謚而相與誌其

墓曰宋篤行君子也尚論周漢豈非其倫肆其嗣子致位三事朕於是稽經據古尊為禰廟作邑於溫以寵嘉之積善之報足以不朽可

母李氏贈

闕二

夫人

敕以高帝子孫而再世婚姻不於勲侯貴戚而於書生是宜有子樹為名儒度越故事以宗人相具官某母具位李氏又故丞相文正公七世孫也代有家法及爾不違克相其夫力行孝友聚族百口曾無間言躬自勞苦

以成永圖一簪一珥先人後已是宜發祥萃于吾相夫
能使其夫稱於沒世而御不及百兩能使其子冠於多
士而養不及萬鍾追錫愍章晉封大國我有異數非爾
曷堪可

妻闕氏贈衛國夫人

敕朕誦二南之詩勸以義示以正皆室家也我有近臣
致位丞弼顧其內助晚不同休可無愍章以賁泉壤具
官某妻具位某氏雖嬪王族實寒畯也晁李二姑簪珥

之望奕世載德誰其嗣之而爾承休襲美無愧在昔克
相夫子遂為名臣夫與之處約於鷄鳴櫛盥之初而不
處樂於象服委蛇之後儻微追錫得無若汝水之墳南
山之側遭世不淑詠歌者乎鄱陽小邦未足言稱晉封
於衛庶幾碩人以配二姑永永廟食可

翰林學士承旨李燾除寶文閣學士知婺州改

知太平州

八月三日除承旨即丐外

敕夫厭直玉堂之廬而紆郡紱士之操也閑勞豹尾之

班而便私計上之恩也具位某早以英華簡在烈祖晚
益蘊藉眷于上皇遭逢兩朝自守一節蓋高文大冊天
下傳誦而微辭幾諫世莫得聞也肆朕纂緒人惟求舊
胡然勇退曳鈴其空朕亦惟自古詞臣一視中外子羽
修令兼為行人相如視草嘗使于蜀朕獨可以弄翰墨
苛留久處卿乎峻延閣之班均便藩之佚不以寶婺而
以當塗去繁就簡冀爾整暇夫下無懷寵之心而上有
從欲之意君臣俱美不其韙歟可

正奉大夫吏部尚書兼侍讀莆田縣開國男食邑二百戶鄭僑明堂加恩進封開國子加食邑

二百戶

敕朕新嗣服將有事於合宮也遠惟孝武始建漢家之封而太史談留滯周南不與從事議者惜之朕敢忘儒先乎具官某經明行修士所高仰不但擢科為天下第一也越從留鑰晉長天官上皇意也至朕而決迨及盛典式遄其歸蓋視漢有光焉增衍封畝第循故事方資

告猷嗣有顯擢可

朝請郎試禮部尚書兼侍讀黃裳封普成縣開
國男食邑三百戶

敕朕新嗣服日有事於合宮兢兢焉懼不閑於禮而無
以接三才之奧也明乎郊禘之義治國其如示諸掌乎
顧朕曾何以得之具官某吾舊學也切磋經誼及於春
秋郊禘之際嚴矣有一不敬至於四卜至於改牲仲尼
正色書之以詔萬世朕所深致戒焉肆予初禋克輯盛

典本所自来簡在三益徹之土田第循故事可與治國
非卿誰哉可

中奉大夫試工部尚書趙彥逾封祥符縣開國
男食邑三百戶

敕朕新嗣服日有事於合宮兢兢焉懼不閑於禮而無
以接三才之與也詩不云乎相維辟公天子穆穆朕嘉
賴焉具官某吾宗英也使于四方拔葵之操雖天下能
誦之比冠從班賢勞忠瘁大節不奪則世未之聞也肆

相子祀克有上儀徹之土田第循故事方圖爾功永稱殊渥可

中奉大夫權刑部尚書兼侍講南昌縣開國子食邑五百戶京鏜封開國伯加食邑二百戶

敕朕新嗣服日有事於合宮兢兢焉懼不閑於禮而無以接三才之奧也詩不云乎相維辟公天子穆穆朕嘉賴焉具官某以海內之英有言有績而執禮行於蠻貊遺愛被於江漢往往薦紳能言之曳履從班義形於色

蓋視漢有光焉胙之食采第循舊章其益論思以稱簡擢可

朝議大夫試右諫議大夫張叔椿封永嘉縣開國男食邑三百戶

敕朕新嗣服日有事於合宮兢兢焉懼不閑於禮而無以接三才之奧也詩不云乎相維辟公天子穆穆朕嘉賴焉具官某以海內之英綽有譽處方平居時恂恂唯謹而侃然正色一臺之上言人所難肆予初政爰貳冢

宰爰長諫垣僉曰汝諧也實相予祀克輯上儀徹之土
田第循故事方圖爾功嗣有寵數可

朝奉大夫權尚書吏部侍郎孫逢吉封廬陵縣
開國男食邑三百戶

朝奉大夫權尚書工部侍郎兼侍講黃艾封蒲
田縣開國男食邑三百戶

敕朕新嗣服日有事於合宮兢兢焉懼不閑於禮而無
以接三才之奧也明乎郊禘之義治國其如示諸掌乎

顧朕曾何以得之具官某吾舊學也蓋嘗與習禮矣每至於掃地而祭至敬無文凡盡內心之道反覆言之肆予初裡克輯盛典非有感於此歟胙之食采雖循故曩無言不酬於是焉在可

太中大夫權尚書戶部侍郎兼修玉牒官建安縣開國男食邑三百戶袁說友進封開國子加食邑二百戶

敕朕新嗣服日有事於合宮兢兢焉懼不閑於禮而無

以接三才之奧也詩不云乎相維辟公天子穆穆朕嘉
賴焉具官某以軼羣之才有言有績輦下彈壓外戶不
閉民曹之令郡國晏然廼若論思義形於色賢勞忠瘁
世莫得聞也肆相予祀克輯上儀增衍封腴第循故事
方圖爾功嗣有顯擢可

中大夫權尚書戶部侍郎西安縣開國男食邑
三百戶梁總進封開國子加食邑二百戶

敕朕新嗣服日有事於合宮遠惟孝武始建漢家之封

而太史談以留滯周南不得從行為恨朕敢忘從臣乎
具官某積有民譽晉貳地官蓋方盡瘁於朝矣銜命北
庭越在萬里之外肆予肇裡獨不侍祠朕是以於漢事
有感也增大食采庸示永懷曷月遄歸將有申錫可

朝請大夫權尚書禮部侍郎許及之封永嘉縣
開國男食邑三百戶

敕朕新嗣服日有事於合宮兢兢焉懼不閑於禮而無
以接三才之奧宗伯掌禮朕之所嘉賴也具官某以海

內之英綽有譽處方貳春官以禮詔予自省牲視滌凡
玉幣爵之事至於告時至於告備治及竣事禮無違者
胙之食采蓋循舊章方疇爾勞嗣有寵數可

朝散郎煥章閣待制侍講朱熹封婺源縣開國
男食邑三百戶

敕朕新嗣服將有事於合宮兢兢焉懼無以接三才之
奧也爰求儒先來相予祀具官某經明行脩士所高仰
而越在藩服朕敢忘之乎昔者孝文受釐宣室召見賈

誼而武帝建封顧使太史談留滯周南不與從事二帝
優劣於是乎見此朕所以式遄爾歸也徹之土田雖循
故事顧俊尊帝蓋庶幾焉可



止齋集卷十五

欽定四庫全書

集部

止齋集卷十六至十八

詳校官庶吉士臣龍廷槐

主事臣呂雲棟覆勘

覆校官主事臣李駿

校對官中書臣范鏊

謄錄監生臣劉晉

欽定四庫全書

止齋集卷十六

宋 陳傅良 撰

外制

特進觀文殿大學士提舉臨安府洞霄宮廣陵
郡開國公食邑五千三百戶食實封一千五百
戶葛邲明堂加恩加食邑五百戶食實封三百
戶

敕朕新嗣服日有事於合宮兢兢焉懼無以接三才之

與也駿奔在廟豈無辟公金玉爾音尚想故老具官某
歷事兩朝蔚為元輔蓋嘗溫恭朝夕執事有恪侍我烈
祖爰暨上皇執珪幣見上帝者屢矣肆予肇裡均佚就
國相維穆穆於以永懷方周盛時微子以二王之後聿
來助祭有客頌之孝武始建漢家之封有臣如太史談
而以留滯周南不與從事為恨朕雖不能比德於周邦
視漢有光焉其因舊章增大食采非苟為恩蓋示不遺
之意可

在外宰執明堂加恩

敕朕新嗣服日有事於合宮兢兢焉懼無以接三才之
輿也駿奔在廟豈無辟公金玉爾音尚想耆俊具官某
歷事烈祖蔚為宗工蓋嘗齊明盛服習於侍祠之禮矣
肆子肇裡均佚分閭相維穆穆於以永懷方周盛時有
客助祭詩人頌之孝武始建漢家之封而太史談留滯
周南以為恨朕雖不能比德於周抑視漢有光焉其因
舊章增大食采非苟為惠盖示不遺可

在外侍從明堂加恩

敕朕新嗣服日有事於合宮兢兢焉懼無以接三才之
輿也駿奔在廟豈無辟公金玉爾音尚想故老具官某
簡在烈祖蔚為名臣蓋嘗齊明盛服於侍祠之禮矣肆
予肇禋均佚殊館或云越在輔郡或云越在外服或云亦既謝事相維穆穆於
以永懷夫留太史於周南自昔浩嘆對賈生於宣室至
今美談朕覽漢事豈能忽然於卿等乎爰因舊章增大
食采非苟為惠盖示不遺可

張淑妃明堂恩贈三代

曾祖

敕朕有事於合宮既蒙嘉貺均休於戚里益廣茂恩眷
言妃德之賢夙備皇宮之列爰稽邦典追賁曾門具位
某氏故曾祖某謙和本於性資醇厚推於鄉黨善修於
身而不享其報慶流於後而端有其原迨其三世之孫
遂應四星之象茲盼祭澤爰陟師垣精爽如存寵光是
服可

魯祖母

敕備慈庭之妃掖象應四星敷祭澤於私門寵及二世
具位某氏故魯祖母某氏柔嘉協則淑謹流徽好善稱
嫺族之間種德及子孫之遠是生賢女闕選皇宮慶霈
漏泉卹章告第懿魂未泯新渥其承可

祖

敕朕肇盛禮於明堂敷大賚于天下惟慈宮之妃列夙
膺皇眷之隆加異典於私庭實率邦彛之舊具位某氏

故祖某官某善積於已行信於人報不在於一時慶乃流於再世澤被女孫之淑象應四星

闕四字

之恩寵

齊三事茲開大國載錫愍書泉隧有光靈魂式慰可

祖母

敕熙事備成湛恩汪濊乃眷四妃之貴列于皇宮爰加再世之封賁其祖配具位某氏故祖母某氏相夫以勤儉為本燾後多福慶之儲孫枝生賢門楣遂大朝敷祭澤邦有舊章爰改胙於營邱尚歆承於褒命可

父

敕方被神釐慶成三歲永言妃德象應四星爰加愍章
用慰禰廟具位某氏故父具官某劬躬有慶操行靡它
豹畧之才高於輩行雞鳴之配出於閨門茲誕布於湛
恩宜追盼於卹典爰因舊爵改畀新封精爽如存寵光
是服可

母

敕朕方謹親祠恩如湛露亦懷妃掖念在蓂莢爰按邦

彞載盼贈典具位某氏故母某氏蔚有婦德克相夫家
凡此嬪則之賢莫匪母儀之訓生蒙象服既極寵光沒
啟茅封又多福履茲敷惠澤更建名邦尚克歆承以慰
冥漠可

右丞相趙汝愚明堂恩贈三代

曾祖

闕二
字

贈太師

敕朕觀成王踐阼肇稱盛禮而歸美辟公相維穆穆文
武宣哲燕及皇天朕甚慕焉屬茲受釐無德不報盖周

道也具官某曾祖具官某積有善祥覃及來裔是生耆哲為吾相臣維周公孤並建五廟賜鬯歸胙洵有寵嘉資爾曾孫共輯熙事而周制亡失何以崇報爰頒異數晉陟師垣庶幾疇勞無愧在昔可

曾祖母

闕

氏贈陳國夫人

敕周之祭澤至於既醉盛矣其詩曰孝子不匱永錫爾類其類維何室家之壺則施及臣子不但其身而亦被于室家具官某曾祖母具位某氏克相夫子行脩閨門

聿生魯孫間我兩社朕惟周人推廣孝思慰滿梱內於茲初稔佐佑乃辟實維爾孫則綏以寵光胙以太姬之國朕敢忘周道乎可

祖

闕二

贈申國公

敕朕閱宗人之譜蓋因侍祠追錫其祖父尊寵多矣未有子孫致位三事而後及此者具官某祖具官某雖在天族猶寒畯也克世其家濟以清約是生良弼簡在兩朝如周諸姬如唐諸李於是度越凡例及於茂恩矧惟

肇裡澤及四海爰錫公爵作都于申其視宗牒不有光歟可

祖母晁氏贈吳國夫人

敕維昔宗婦不少概見而衛有碩人魯有令母於周諸姬獨著名於六藝豈不盛哉具官某祖母具位某氏以濟陽之晁來奉漢祀廼生孝子名在薦紳廼生聞孫功在清廟肆盼祭澤洽比幽明申命于吳增大爾邑蓋與衛姜魯母相望千載亦足為宗婦之勸矣可

父闕贈闕國公

敕朕讀史至漢興以來宗室子弟無得公卿位者而坐
酎金奪國動以百數未嘗不慨嘆也於是既祠純用周
政策宗輔告其文人申錫名邦宏賁禰廟具官某父具
官某以同姓而行誼篤於韋布以右選而聲聞賢於儒
林即所躬行施及其子遂魁多士遂冠從班擢自樞筦
徑司宰事疇昔之夕相予合宮三靈具依百福來下洪
惟我家生此賢哲本支百世與周匹休下視漢事則九

原可以自慰矣可

母李氏贈冀國夫人

敕朕既舍爵書勞為公卿大夫崇報禰廟則母氏與享
可無褒典使之匹休具官某母某位某氏嘗相其夫以
孝聞於四海嘗教其子以賢著於三朝日者爾子相予
世室克輯盛儀而可忘所自乎因其舊號錫以新封我
圖冀方用以命汝其世世享以綏後人可

妻關氏贈益國夫人

敕魯人之頌僖公至於閼宮享祀不忒及其令妻以是
為內助之賢也具官某妻具位某氏嘗與吾相臣共隱
約躬定省想夫蘋藻之共俎豆之飾以薦時事無或不
虔也日者合宮而爾夫有駿奔之恭無跛倚之色推本
內助賢於魯人我錫贊書晉封於益奚斯作頌侯邦之
私孰如爾名藏在王府可

知樞密院事兼參知政事陳騤明堂恩贈三代
曾祖贈少保數贈太保

敕朕觀成王踐阼肇稱盛禮而歸美辟公相維穆穆文武宣哲以克燕安甚心慕之屬茲受釐無德不報盖周道也具官某曾祖具官某躬行對于古人汎愛聞於鄉譽而懷道不試士論惜之集為善祥覃及來裔是生耆哲為吾樞臣維周三孤並建五廟賜鬯歸胙有寵嘉資爾曾孫共輯熙事而周制亡矣何以崇報申錫命書晉陞帝保以義起禮亦庶幾焉可

曾祖母滕國夫人成氏贈福國夫人

敕周之祭澤至於既醉盛矣其詩曰孝子不匱永錫爾
類其類維何室家之壺則周家忠厚施及臣子不但其
身而亦被于室家具官某曾祖母具位某氏克相夫子
行修閨門是生曾孫功在宗社且夫既醉非旅酬之事
歟推廣孝思慰滿梱內況朕初禋懼闕於禮佐佑乃辟
實維爾孫則綏以寵光為之報本侈其舊封胙以上國
朕何愧於周乎可

祖贈少傅策贈太傅

敕朕既本之六藝不愛高爵以宏貴陳氏之祧則嗣有
令德休于後昆可無褒典以應經誼具官某祖具官某
當天下之清得幽人之履太史之觀風不講而文采無
以自見孝廉之科廢而實行不上於計書也天命弗僭
為之生孫既長樞庭又陪國論推本所自當及茂恩肆
予初禋疇勞相祀宜及爾考並為三公荷天之休其世
世享可

祖母崇國夫人朱氏贈福國夫人

敕既醉之卒章曰釐爾女士從以孫子言周之羣臣皆有士行之女以爲之妃使生賢智子孫足以傳世具官某祖母具位某氏夙以懿行嬪于名門儀于前人以詔婦子載篤厥慶萃於聞孫夷攷其行不足以當既醉之卒章乎有崇故封未足言稱大邦美號聿從其姑質之二雅誰曰不可

父贈少師諱贈太師

敕自亞保以來及是三葉蓋王室百年之間而劬躬燾

後如一日也於吾宗工尊為禰廟朕豈敢畱於禮乎具
官父具官某義方之教不以羸金陰德之傳不以駟馬
成我碩輔蔚為宗工緯武經文何鄉不可是不謂之賢
考歟日者合宮有嚴美報生民尊祖視古不慙而大臣
之禰位不稱德以卑臨尊殆非周道中錫贊書冠班九
棘非以為生蓋禮之稱可

母杞國夫人成氏贈福國夫人信國夫人王
氏贈福國夫人

敕為吾股肱之臣上自三世皆褒大之而況於其母乎
御不及百兩養不及萬鍾也而無以慰之予心惻焉具
官某母具位某氏承休襲美發育自躬恩斯勤斯鞠我
良弼采蘋所共雜佩所贈恭儉精白無非教也揆諸周
制則被以象服乘之魚軒為君夫人孰爾宜者亦視王
母並建大邦雖曰均釐誠有以致此矣可

妻闕氏封闕

敕朕誦二南之詩流苴采蘋相與共祭自天子達皆內

助也仲尼序詩定為篇首寓意深矣具官某妻具位某氏来自名門克相夫子會朝有鷄鳴相警戒之道而退食有鵲巢致節儉之德日者合宮而駸也相予肆祀吉蠲齋明迨及竣事禮無違者則豈唯闕睢之助哉而爾亦與有勞矣錫之美號爰示寵光雖曰舊章實應經誼可

給事中兼直學士院樓鑰明堂恩父贈通奉大夫
璩加贈正議大夫

敕朕既舍爵書勞自卿大夫以次第賞矣則推其世家
為之報本雖禮未有獨不可以義起乎具官某故父具
官某生為才大夫而用不盡歿為賢考而何其流之長
也屬予初禋百執事在廟爾鑰不但駿奔匪懈而發揮
潤色凡祀之大號皆稱朕意非爾素教而克然歟追錫
有彛爰進厥秩非以為生亦德之稱可

權吏部侍郎孫逢吉等明堂恩贈父

敕朕既舍爵書勞自卿大夫以次第賞矣則推其世家

為之報本雖禮未有獨不可以義起乎具官某故父具

官某生有種德之美而位不稱歿享義方之報

袁說友章穎父

云生為才大夫而用不盡歿為賢考而何其流之長也屬予初禋百執事

在廟爾某不但駿奔匪懈而敬之顯思之戒日徹於聽聞也劬躬燾後非爾素教之所自來歟追錫有彛爰進厥秩非以為生亦德之稱可

煥章閣待制侍講朱熹明堂恩贈父

敕朕方舍爵書勞自吾從臣以次第報則推本世繫及

其禰廟皆寵綏之亦祭澤也具官某故父具官某少而英發晚益深造渡江諸老多其師友嘗歷郎闈秉史筆力詆和議緒正謗史盖官雖薄而志在於天下後世也位不稱德識者恨之屬予肇裡有嚴美報則爾有賢子勸講路門可無褒典以慰罔極之懷乎追錫崇階用賁泉壤非以為生亦德之稱可

母

敕朕既為卿大夫宏賁禰廟以侈教忠之報則母氏與

享可無申錫使之匹休具官某母具位某氏来自名家
克相夫子本之純厚申以敬恭其仰而事姑備極順適
俯視媵御又何其不察察也是宜篤慶聿生賢子蔚為
儒宗名滿天下則加以美號用慰孝思我有茂恩宜不
汝吝可

右諫議大夫張叔椿明堂恩贈母

敕朕方舍爵書勞自卿大夫以次第賞則為之報本及
於母氏使匹休於禰廟不亦可乎具官某故母具位某

氏克相大雅如商甘盤復生賢嗣如唐陽子然而生不得與於從爵之榮晚不得享夫五鼎之養儻無愍章以責幽壤何以慰爾之廢蓼莪也因其舊號益以新封雖曰邦彛亦足用勸可

妻

敕朕誦二南之詩勸以義勉以正皆室家也我有從班豈無內助具官某故妻具位某氏儀于前人克濟其美遂相夫子為吾諍臣夫與之處約於鷄鳴榔盥之初而

不與之處樂於象服委蛇之後儻無追錫得無若汝水之墳南山之側遭世不淑詠歌辛苦者乎爰錫贊書以賁幽宅可

孫逢吉明堂恩妻恭人李氏封令人

敕朕誦二南之詩至於流苴采蘋相與共祭自天子達皆內助也故詩人誦之仲尼定為篇首其意深矣具官某具位某氏以爾夫子為吾從臣肆予初裡執事有恪以朕之獲助於長秋則爾亦可以受不失職之賞矣晉

封美號庸示寵光雖曰舊章實應經誼可

在外侍從明堂恩贈父

敕朕既舍爵書勞自卿大夫以次第賞矣則推其世家
為之報本詩不云乎孝子不匱永錫爾類盖周道也具
官某故父具官某生有種德之勤而位不稱沒饗義方
之報而何其流之長也屬予初裡有嚴美報生民尊祖
視古不慚而可以忘爾某之禰廟乎本之經誼追錫崇
階非以為生亦禮之稱可

在外侍從明堂恩封妻

敕朕誦二南之詩至於流苴采蘋相與共祭自天子達
皆內助也故詩人誦之仲尼定為篇首其意深矣其官
某妻其位某氏以爾夫子為吾從臣肆予初禋克輯盛
典則豈惟長秋之故亦爾臣工嬪婦闕二其流及上則
不失職之賞庸可後乎晉封美號爰示寵光雖曰舊章
實應經誼可

汪大定知九江郡

敕具官某嘗為嶺南郡卓然以廉惠聞而無以旌異之
何以勸遠吏乎九江名邦牧以選授是用命汝式賞賢
勞益圖民庸以俟迪簡可

倉部員外郎汪梓陞郎中

八月十四日除

敕以日月為功固非所以待賢能也而功令亦不可廢
况晉陟為郎與員外置者絕有間抑足以昭宿業勸寡
過庸可廢乎可

朝散郎江西提舉汪達除員外郎

敕具官某難進易退賢士之操也爾某議禮容臺浸有
休問汲汲焉以外服為請雖留行不顧也將指奏公亟
頒召節則舒遲累月翔集可觀是不謂之士操歟郎聞
之選南宮最清往其欽承踐修家學可

中奉大夫提舉冲佑觀豐誼除吏部郎官奉議

郎王聞詩除考功郎官

並九月
八日

敕具官某等仕至於刺史二千石亦通顯矣而浩然有
歸志是不謂廉退之操歟爾誼持節湖湘吏畏其敏而

固稱老爾聞詩秉麾淮甸民安其寬而固諗疾朕以是
嘉之俾還郎省分治銓事往祇成命母有遐心可

止齋集卷十六

欽定四庫全書

止齋集卷十七

宋 陳傅良 撰

外制

同知樞密院事京鏜初除贈三代

曾祖闕贈太子太保

勅昔宣王中興登用將相必推其世系本之始祖自南
仲召虎韓侯之雅皆為此言謂是文武成康之世積累
致然而非一日之故也其官某故曾祖某躬行對于古

人鄉譽高於月旦而懷道不試有識惜之爰及曾孫遂
生賢佐夷考其世則朕之得人所自來遠原始根本可
獨愧於周乎追錫宮保視儀孤卿雖曰舊章實應經誼
可

曾祖母闕氏贈郡夫人

勅周之公孤並建五廟以君夫人祔焉而世世享亦惟
羣臣能有助於國者必有助於其家者也具官某故曾
祖母某氏來自名門作配君子躬備勤勞以詔婦子而

生無從爵之榮歿不得與於共牢之享天命弗僭是
生曾孫為吾輔臣以翊樞筦朕循周制寵綏爾夫申
錫郡封視古命婦用賁幽宅亦足以報可

祖贈太子少傅

敕成王之雅曰凡周之士不顯亦世世之不顯厥猶
翼翼思皇多士生此王國蓋言周之得人由文王以
來世家之所由生也具官某故祖某克承其緒以紹
前聞因之以共儉加之以惠和至於生孫偉然人望

佐我宥府海內晏然揆諸周人寅念祖烈及其世家
則爾躬燾後可無褒典以慰居往命之儲傳於禮
固宜可

祖母

敕朕既純用周政廣恩錫類以褒大吾輔臣之世則
燕及閨門宜有追命使之匹休具官某故祖母某氏
儀於前人益謹內則載篤其慶萃於閭孫方周盛時
公侯皆君子也而風人本之衽席以為德在鵲巢功

右正言黃度乞祠祿差主管冲佑觀

敕具官某昔者汲黯薄淮陽而願備左右拾遺補過
蓋天下不以黯為懷寵而咎漢武之不容直士也姑
蘇近輔朕重其牧以爾度懷材厲操濟以惠和是用
輟從諫省以重北門而不屑就若爾度有汲直之風
矣無乃使朕似漢武乎從欲奉祠固非朕意毋為考
槃永矢弗告則予汝懷可

考功郎官王聞詩覃恩轉官

敕具官某朕方罷祠而爾適歸留之郎闈以濟世美緣恩進秩又率舊章視漢賈生召對宣室而不見用爾不謂之遭時乎可

知寧國府木待問除煥章閣待制

敕朕方隆孝治瞻言慈宸昔者所進今誰在乎將第其功而何舊學越在外服也具官某蚤以擣筆簡在烈祖晚而勸講眷於上皇胡然江湖荏苒歲月一時輩行迭為三事而猶紆宣城之組乎自魁多士及班

從官於今守宣事久論定而又遭世不淑克究爾心
活瘠起痿闔郡見德朕覽奏計益嘉賢勞次對西清
我有異數一朝酬之誰曰不可可

尚書吏部員外郎李季友除右司員外郎

敕具官某詩不云乎彼都人士狐裘黃黃其容不改
出言有章爾某似之輟從郎闈來掾宰事蓋將試可
以究爾能尚其懋哉毋曰序進可

韓彥直致仕

敕三朝法從方欽企於告猷奕世賢勞何遽聞於謝
事姑惟從欲盡亦疏恩具官某顯允材猷懋昭聲聞
以雲臺功臣之後奮自儒科以璧水寒峻之交明於
世務踐更中外嘗試險夷投之於撥煩而咸宜強之
以易武而不愠至於歸休殊館殆遺簪紱之榮論次
本朝雅有簡編之樂肆予初政懷此舊人屬抱沉疴
竟安居里亟頒新渥猶阻侍朝覽奏牘之所陳想拖
紳之何及晚節末路固莫奪於忱辭故國世臣尚益

綏於壽嘏於焉增秩抑又念功可

四川制置使奏辟知叙州慶符縣謝辛討捕
叛夷有勞身死特贈

敕某官以攝官而冒萬死以保縣而奏膚功有臣如
此而無位無年可為嘆惜也追錫一秩寄於異恩以
慰沉寘且勸來者可

煥章閣待制知鄂州王信知池州

敕故事以待制而上官典於大州大抵以望郡多宿

兵耳朕方以此意擇牧敢輕授乎具官某奮於書生而為才大夫肆我烈祖簡在法從代言掖垣闕敕璣闈議論風指聳聞一時蓋薦紳翕然以為落筆妙天下也晚領名藩屢聞最課夫鄂渚池陽今江湖重兵處也萬竈與民居相錯而介士往往不樂於文吏朕即已試自鄂徙池爾其深知托重之意而不厭薄以是為煩調護也而非苟易置則予汝嘉可

端明殿學士趙彥逾改除四川安撫制置使

兼知成都

敕分間於外蜀為專宿師於邊蜀為重欲省賦以裕民又蜀為急而比年謀帥多輟從臣朕擇其人班在丞轄尤所以加惠蜀也具官某廉足以律百吏之貪靜足以應多故之變簡在兩朝績用甚茂至於試之撥煩而無難辭居之絕遠而無愠色又何其過人也羽儀禁涂物望愈偉肆朕嗣服益見忠操引以自近宜在本朝朕亦惟自昔功業之臣一視中外鄭武相

周義和就國鄴侯當軸平陽徂齊以卿一意首公無有遐邇其為朕崎嶇萬里以寬西顧豈顧介然於懷歟昔在神考亦強趙抃而今朕所以煩卿又自有意噫周以宗強苟不居中必為二伯此王道也非朕所以煩卿之意乎式遄其歸日月可冀可

新除江東提刑陳公亮除福建轉運副使

敕具官某凡持橐內之節往往雅意本朝也爾詳刑於郊風績甚茂簡在慈宸行且遄歸而秉心無競固

自引卻將輸江表亦非其好我圖爾居莫如閩部會
使者易地爰改畀爾其為朕通八郡之鹽筴以紓吾
民則朕以懌可

趙渙補官

敕具官某歷學不精占天者病之爾以家傳蓋究其
術自吾賢士大夫亟稱焉取諸右階使為保章氏其
與疇人訂正疏畧以成吾敬授人時之志可

潛邸有勞轉官

敕具官某朕第酬潛邸之勞雖小臣不忍遺而亦不敢私也以爾歷年彌久庸進二階其尚靖共毋曰倖得可

薛登降兩官

敕具官某古之人重請而況違三尺以請乎違三尺以請且不可又以不得志焉而咎所從請之人宜鵠兩階以警貪冒可

骨舜輔隨金國賀正使充引接儀範回程循

修職郎

敕具官某凡出疆者有賞所以勞苦之也爾嘗隸使
事與於驅馳爰進一階且書於籍為賞亦不薄矣可

趙公介知舒州

敕具官某龍舒於淮為名郡擇守往往皆名流也爾
所試吏雅有治稱蓋薦紳翕然以為通才爰付此土
以究爾能尚其懋哉以圖報効可

趙謩知嘉定府

敕具官某爾以蜀之人望之予而典州有治行是用
明陟畀爾潛藩矧嘗為別駕民譽藹然於焉分符可
謂衆允詩不云乎維其有之是以似之益茂乃績無
忝所生可

淮西提舉張同之磨勘合轉一官乞回授封
母

敕具官某以年勞增秩其在功令會計至纖悉也而爾
同之固請貤恩於母是足以發明人子之心矣詩不云

乎是用作歌將母來諭此周所以勞使臣也爾方馳驅
淮甸勞來安集吾民則朕豈有愛於此哉可

朝奉大夫江東提舉陳士楚除吏部郎官

九月二十

一
日

敕具官某爾以舊學之臣持節行郡且滿歲矣趣歸郎
省以慰永懷經說一編尤在藏史朕方資之潤色初政
無言不酬將有殊渥可

朝奉郎湖北提刑陳謙收捕徭寇有勞特除直

煥章閣

敕具官某有以書生而可以即戎是不謂之長才歟爾
某嘗有位於朝矣介在下僚無以著見試之劇郡談笑
而理越持湖節遂克徭寇誠得如數十輩萬物吐氣非
爾之謂乎寓直延閣姑以勸功寘諸周行誰曰不可可
汪楚材王圭收捕徭寇特轉三官

敕具官某徭人犯邊爾以戶掾攝機幕

王圭云爾以彊吏

能帥

其旅不日克之有司差其獲級宜進三階悉以畀汝以

勸果毅可

知宜州沙世堅收捕徭寇有勞特轉團練使

敕具官某爾威名著於嶺南薦紳能言之比擢自遠服
改畀郡符而桂林之奏牘始至日者討平徭人爾功居
多朕益壯之粵自刺州寵以戎團之峻賞不踰時吾豈
愛此義不辭難汝將安報乎可

知饒州樂平縣楊簡除國子博士

九月二十七日

敕朕方崇長學校所以加惠諸生甚渥也則聯教事於

其間宜得名士爾簡蚤有賢譽不求聞達徒勞縣章益務持養是以不俟滿歲俾長胄子豈惟諸生又以為善類勸也可

廣西提刑胡長卿除廣西路轉運判官主管冲佑觀張玠除廣西提刑

敕具官某嶺南去朝廷遠而民困於鹽筴之數易枉於訟鈺之偏聽朕惻然念之為擇膚使以爾長卿嘗司臬事晉之輸漕以爾玠嘗持湖節俾之詳刑其各為朕布

宣德意以惠遠氓則朕以懌可

國子正陳希點太學錄湯璿並除太學博士

九月

二十

七月

敕具官某朕新嗣服崇長學校所以加惠諸生甚渥也
則聯教事於其間亦盍序進矣爾希點爾璿俱以名勝
來掌學士之版譽處藹然也晉之講席發明經意僉曰
汝宜則朕以懌可

祕書省正字李璧除校書郎

九月二十九日

敕具官某詩不云乎君子有之維其有之是以侑之以
爾先人文墨議論之選而垂名千載但見於史筆宜爾
之能嗣其業也校讐冊府益博爾文鴻漸之序於是焉
始可

主管架閣文字陳忞除國子正戴溪除太學錄

並十月
一日

敕具官某朕方崇長學校所以加惠諸生甚渥也則聯
教事於其間宜得名士爾溪爾忞皆以經行教授于鄉

從游之屢滿戶外也凡學之胄子與國俊造爾其為我
糾治校數之益自著見以須明陟可

端明殿學士四川安撫制置使趙彥逾贈三代
曾祖少師崇國公謚清簡加贈太傅

敕朕閱宗人之牒蓋追錫其祖父尊寵多矣未有子孫
以功名著見致位丞轄而後及此者具官某故曾祖具
官某雖在天族猶寒畯也克世其家濟以清約易名之
謚同姓盖鮮是豈苟得之哉廼生曾孫簡在法從肆朕

嗣服厥功甚茂於是度越凡例及於異恩而爾亦自三孤晉陞帝傳其視宗牒不有光乎可

曾祖母崇國夫人 闕氏加贈闕國夫人

敕婦德為難而宗婦尤難其人也朕觀詩人之誦賢婦於諸姬獨稱魯衛豈不謂之難歟其官某曾祖母具位某氏出於名門作配崇國絜純自持動有軌度假使生周之時則衛姜魯母之倫矣侑食于崇於禮為稱晉封大國又以聞孫凡爾宗婦視此用勸可

祖闕二加贈太子太傅

敕朕觀漢宗室以恩澤侯且王者何限曾不長久往往
國除世祿之家鮮克由禮古人所以歎息也具官某故
祖具官某以崇國之子益自好修克勤克順以詔厥後
至于孫子遂為幹臣而朕亦追錄其種德之功為之美
報粵自右階亟躋宮傳其視漢王侯自著浸微何相絕
也尚克有知足以自慰可

祖母淑人

闕氏贈

闕二

郡夫人

敕詩不云乎蓺之榛栗椅桐梓漆爰伐琴瑟況得才而
用之而不錄其所自生非詩教也具官某故祖母具位
某氏作配君子行修於家覃及其孫廼生才美周人作
頌祖妣攸同盖未有不獲助於其內而收効於其後者
粵自命婦䟽以郡封為君夫人實應經誼可

父闕二
字加贈太子少師

敕自帝傳以來於是三葉而義方之教何其獨隆也具
官某故父具官某以王公之胄而有士大夫之習非無

富貴之階而宦不達也集善為祥聿生賢子清名特操
庶幾儀休其視漢儒不以簞金而以一經不以駟馬而
以陰德殆無愧焉寵之宮師雖曰褒典非以為生蓋德
之稱可

妻淑人闕氏贈闕郡夫人

敕朕誦二南之詩勸以義勉以正皆室家也我有近臣
致位丞弼顧其內助晚不同休可無愍章以賁泉壤具
官某故妻具位某氏儀于前人克濟其美遂相夫子曳

履從班夫與之處約於鷄鳴盥櫛之初而不與之處樂
於象服委蛇之後儻微追錫得無若汝水之墳南山之
側遭世不淑詠歌辛苦者乎粵自命婦䟽以郡封爾其
享哉永祔姑室可

龍圖閣待制知潼川府閬蒼舒除煥章閣直學
士提舉江州太平興國宮

敕朕新嗣服有懷耆俊庶幾聞而作興曰盍歸乎來而
何遽以賢勞欲解州組不顧乎具官某材猷出於輩學

議論近於前聞蚤陪禁路邁往不羣而晚為岳牧又何其豈弟也竟上懷章將就居里六閣通班莫高於學士殊庭均逸莫便於外祠申錫命書勉從所欲母為考槃永矢弗告此朕之所以圖於卿也可

知成州宇文子震知潼川府

敕具官某以吾臺閣之臣而淹恤之久僅起為州又絕遠外此士論所甚鬱鬱也潼於所部為東西蜀地望甚重畀爾州組庶完爾能益輯外庸嗣有褒異可

新知真州權安節除利州路轉運判官朝奉大
夫徐枬除廣東路轉運判官

敕具官某等夫持節行郡國是為周王人漢部刺史也
然周以下士漢纔秩六百石何歟深知此意宜何以圖
報乎爾安節尚懷郡章爾枬常有朝蹟會擇遠使僉曰
汝堪此周漢意也安節誠以其惠清江之民者將漕於
蜀部枬誠以其惠零陵之民者將漕於嶺表調度不煩
抑揚無阿是足以歸報矣可

司農寺丞李大異除夔州路轉運判官

十月二十日

敕具官某夫持節行郡國是為周王人漢部刺史也然周以下士漢纔秩六百石何歟豈非擇英俊之在下僚者試可之乎爾大異嘗以文藝得雋春官蓋輩學往往臚仕而方抱槧修書徒勞州縣之間也晚綴班行又寂平進若爾者是足以循周漢之制越次而出節矣將漕夔門布宣德意自今以始庸究爾能可

籍田令費士寅除太學博士

十月二十日

敕具官某以西州之彥嘗先闔郡策名春官日來造朝
風度醞藉東州士樂與羣居也猶為藉人未足著見分
以橫經之席往哉汝諧可

武學諭黃褒然除武學博士主管架閣文字蔣

來叟除武學諭

並十月
二日

敕具官某等右學猶左學也朕既妙選凡掌東學之士
則右學可以次舉矣以爾褒然晉都講席爾來叟聯教
事於其間經武緯文於穆士論不亦可乎可

知信州石畫問除司封郎官淮西提舉張同之
轉一官再任

敕具官某等荒政十二著於周官苟非其人是徒法也
爾畫問以郡太守同之以州刺史當歲不淑克究爾心
使境內無菜色計書來上朕甚嘉之誠得監牧如二人
者布之海內吾民其蘇矣乎書勞進秩宜見褒異至如
畫問訖事遄歸郎省同之善後因任使華朕意攸屬無
有內外可

軍器監主簿王恬除司農寺丞將作監主簿劉

三傑除太府寺丞

並十月三日

敕具官某等列寺丞非所以見才也以今仕版徒勞州縣蓋未嘗有一日朝蹟者而校數之則是亦足以致身矣爾恬爾三傑非嘗淹恤於州縣者歟頃因闕揚簿正二監今以恬丞大農三傑丞外府豈足見汝才哉尚務靖共以須器使可

主管官告院李孟傳除將作監主簿幹辦諸司

糧料院張震除軍器監主簿

並十月四日

敕具官某等二監於百官事為簡簿正之職於監事益簡有以好修不務競趨者居之斯不謂稱乎爾孟傳震無以為序進而不加勉也可

浙西提舉鄭公顯改除湖南提舉

敕具官某漢三互之禁吾本朝莫之行也至士大夫以嫌自言則亦從欲以便其私爾公顯持寰內之節風指凜然而以司憲姻黨雅不欲聯事也懃章來上易汝湖

湘姑徇爾懷母曰胥遠可

止齋集卷十七

欽定四庫全書

止齋集卷十八

宋 陳傅良 撰

外制

知襄陽府張杓知建康府

勅維周公太公功在盟府而伯禽見於費誓呂伋見於
康王之初克世其美垂名六藝顯允魏公弼亮二祖咨
爾後人宜自著見具官某踐修厥猷謀畧輻輳牧民馭
士何鄉不可內史槩發文昌論思績用甚茂稱者不容

口也備邊襄州隱若敵國太上疇勞欲徙秣陵而未果
肆朕嗣服爰咨分閭托重留鑰莫如爾宜且夫金陵魏
公之所經畧也元勲大節賁志未就歷年於此胡能嗣
之文事武備兼修者何術內寧外憂長慮者何事其究
爾心以圖忠報豈惟先正將二祖亦寵嘉之可

朝散大夫知南外宗正事趙不遡換右監門衛
大將軍濠州團練使擢知大宗正事

勅具官某自藝祖置太宗正以睦親族蓋歷年於此本

支蟾聯世次櫛比而無忒違職此之由可不謹擇之乎
爾屬尊而身修宦達而志無競爰自左選改畀南班秩
以門衛之崇加以戎團之峻甚尊寵矣益輯宗盟以綿
帝系往其勉哉可

直秘閣劉穎除直顯謨閣江東轉運判官

勅具官某課賢勞耶則誰如汝多采民譽耶則誰如汝
著況久淹恤朕豈忘汝也江表將漕司存與留都相時
盖視畿甸等耳煩爾調度以寬州縣之急歸報有期勿

替前績可

浙西提刑黃適知贛州

勅具官某粵從臺掾遂昇畿節不可謂不遭時矣章貢名邦選牧為重而其民亦號難理夫地重則須宿望事難則藉容德疇洛爾宜就畀州組益究民庸毋曰遠外可

太學上舍生李斗南葉元英賜釋褐出身

敕某等科目之制至嚴密也而繇學校進者則課其功

緒蓋有不待試於春官而策之廷者焉亦既得雋矣肆
子嗣服又拔其尤若爾某某者而即官之則所以加惠
諸生豈不盛哉可

侍衛步軍司後軍統領戚拱宿衛部轄官兵特

贈一官

卽建孫光祖鮑信陳孝
慶孫顯忠夏震並同

敕具官某環列之尹著於春秋書勞進秩則有常典爾
其毋憚煩使式克欽承則予汝賞不一而足可

湖南提刑趙不過除江西提刑寺丞趙某除江

西提舉

敕具官某等自江以西綿地數千里其吏善讀律其商善趨鹺茗之利而其田疇多旱潦部使者得其人則刑罰中而訟詬之俗易禁弛散斂行而民不失業以是不過詳刑湖湘不偏聽於單辭爾闕率職省寺謹厚而無失其以不過序遷臬司闕為庾氏皆王人也觀省風謠布宣德意可不勉乎可

張綬除直秘閣宮觀

敕具官某以熙寧論事之臣之後其文足以自見其學
足以自飭此吾烈祖所以寘諸冊府上皇以為郎若卿
也晚分郡符數上奏計雖不見察於部使者而見直於
言路而東心無競固請解組成爾素履歸休外祠還爾
舊著寓直延閣尚對新渥以為後圖毋若考槃永矢弗
告可

江東轉運判官劉穎知平江府

敕具官某將輸江東方錫贊書擇牧吳門又分符竹爾

亦喻朕指乎以爾才足以撥煩且宜引以自近也夫足以撥煩則弭節而為劇郡所以發游及之有餘引以自近則置諸扶風馮翊之間蓋鴻漸之序也深喻此指無非簡記盍疾其驅以對新渥可

李嘉謀知襄陽府

敕具官某維烈祖旁求西州之士幾無遺材用以為公卿大夫多矣而一時同進宿留州縣位卑官薄聲聞藹然者猶一二數朕所以式迨其歸也會乏襄陽之帥僉

謀惟久而又中道輟汝以寬顧憂是豈朕初意乎夫旅
進周行每恨非功名之會久勞外服又懷無拾補之益
有能於此何鄉不可則通儒也爾其欽承以圖忠報可

新除福建提刑盧彥德改江東提刑

敕具官某觀蜀道之歌湘纍之賦則知士大夫不樂久
宦於此也爾某崎嶇荆益至於累年晚歸郎闡意不自
得懇章亟上持節七閩夫安於平進而樂遠外曾無纖
芥見於詞色是不謂之吉士歟以嫌自引易地江左姑

徇爾懷嗣有它寵可

權戶部侍郎梁總除刑部侍郎

敕朕誦周書至立政用人之戒詳矣而三致意於庶獄
至於卒章獨告司寇蘇公夫皆準人也他無所概見而
司寇獨明言其人何歟蓋謹而書之也具官某以寬厚
長者名當世而以法士名其家夫法士則深於文而長
者則傷於惠二者皆偏才也而卿獨兼二美焉頃為理
官空圖案月及掌邦計郡國晏然銜命來歸備見忠瘁

晉貳秋官此蘇公之職也式敬爾獄以長我王國爾尚無愧於周書哉可

司農寺主簿張孝伯除國子監

十月十一日

敕具官某朕方加惠諸生凡聯事於成均者皆遴選也
胄監有丞與聞學政以爾孝伯雅致不渝肆用命爾其
益好修以須明陟可

諸王宮大小學教授姚愈除司農寺丞國子監

主簿羅克開除軍器監丞

十月十一日

敕具官爾愈爾克開皆以文雅嘗與聞學政矣而以愈
丞農扈克開丞戎監蓋試煩事益究爾能左右具宜則
有明陟可

直秘閣兩浙轉運判官黃黼除直龍圖閣陞副
使再辭龍圖改除直顯謨閣

十月十一日

敕具官某以元祐名宦之後而其學足以自立才足以
自見也將漕郊畿燕及三輔朕圖爾功正名使華晉職
儀閣是豈謂之過歟而何遜章來上至于再三也益嘉

廉操少却文謨雖不償勞亦足厲世可

倉部郎中汪梓以趙汝愚親嫌除淮東提舉

十月十

十四日

敕具官某朕不以防禁過臣下而或自言嫌則亦從欲
以便其私爾大臣之子克世其家比解州紱端歸郎舍
嘗試未久譽處有聞顧以當路之嫌願就外服政畀淮
節以華其行雖徇爾懷亦足風厲可

大理正閭邱泳除利州路提刑

十月十七日

敕具官某夫持節行郡國是為周王人漢部刺史也然周以下士漢纔秩六百石何歟深知此意宜何以圖報乎爾為理官亦既累歲博文敏事似不能言會擇蜀使咸曰汝可若爾者足以循周漢之制越次而持節矣詳刑於蜀庸究爾能往其欽承以須明陟可

秘書監兼實錄院檢討官薛叔似除權戶部侍

郎

十月二十八日

敕朕欲省賦甚而用不足蓋嘗歎息安得執古以御今

之士與之共圖邦計乎而澤下究也具官某習於六經之道而明當世之務自薦紳先生下逮新進稱爾不容口也屬茲銜命萬里來歸革帶蔬食行乎蠻貊朕甚嘉之曾未復命擢貳民曹夫從班豈所以償勞乎可使治賦孔門之學何以利國孟子不對於斯二者並行不悖此朕之所圖於汝也尚其懋哉以永士譽可

起居舍人兼侍講劉光祖除起居郎司農少卿

鄧駟除起居舍人

十月二十八日

敕具官某左右史朕所嘉賴以謹言動爰自嗣服儀圖
其人皆舊學也爾光祖駟頊在儲寮蔚為國士而光祖
繇霜臺駟繇騎省各以論事不避權近俄而去國朕甚
懷之蓋嘗嘆息安得三益以自近也今之歸止實慰我
心其以光祖序進左坳駟擢居右陞豈徒以是為私乎
其繼自今直筆在前則出入不欽號令不減將懼思焉
爾其懋哉勿替初意可

國子祭酒彭椿年除直龍圖閣江東路轉運副

使

閏十月
二日

敕具官某昔荀卿嘗為祭酒矣而卒老蘭陵後世恨之
爾某於今百辟最先進也方在諸生及見故老比為博
士獨抱遺經而自詭治民遲遲翔集蓋累年於此矣晚
長成均雅不自喜亟上懇牘欲使其私將輸江垓陞華
犧閣雖寵爾行而朕尚冀爾無遐心也以解荀卿之恨
亦有意乎可

大理寺丞林思齊除大理正

閏十一
月二日

敕具官某本朝重科目而有以奕世父子一門伯仲赫
然聯翩擅聲名於場屋若爾某者豈不足貴乎而何州
縣淹恤亟稱賢勞岳牧論薦始有朝蹟也淑問獻囚士
論惟允俾為理官自丞而正鴻漸之序嗣有樞官可

戶部郎中王既除直秘閣知平江府

閏十月三日

敕具官某治辦之吏患在缺薄豈弟之長或不事事此
二千石所以難其人也爾自分郡寄比遣使華長於心
計往往所在足用而長財也而捐以予民動累鉅萬蜀

道之人至今懷惠若爾者可以托千里之國矣吳門擇
牧蓋久而後得之輟于望郎華以寓直爾其懋哉勿替
民譽可

太府寺簿范蓀除大理寺丞

閏十月
三日

敕具官某奕世載德孰如范氏爾克踐修益自問學色
辭粹溫君子人也俾丞棘寺未究爾能謹視刑書嗣有
寵數可

朝請郎權發遣滁州石宗昭除度支郎官新改

除浙西提舉吳鑑除司封郎官

九月八日鑑閏十月十四日

敕具官某等以吾冊府校讐之臣而越在外服不知其反期何時非所以為經生學士勸也爾宗昭鑑嘗同日給筆札試于玉堂之廬觀如堵牆其美無度而何宗昭在淮鑑在湘之久也夫合江之水環滁之山將指承流爾固樂此公論不置盍歸郎闈其並來朝以對新渥可軍器少監兼權司封官李大性除浙東提舉知

常州黃灝除浙西提舉

大性十月三日
灝閏十月四日

敕具官某今二浙猶三輔也比歲不登仍以旱潦荒政
十二其誰與朕推行之乎爰諏其人得於周行則汝大
性得於列郡則汝灝也東西二節於以分畀平興碩積
悉咨聽之吳越之間民無菜色我有褒璽必不爾後可
太學博士陳峴武學將士陳邕並除秘書省正

字

閏十月
十四日

敕具官某等朕命以雲漢側身之誼策爾於玉堂之廬
爾峴不徒具文而有惻隱之實爾邕科別其條而昌言

之不枉於執事文詞拳拳皆可觀也冊府儲才得爾惟允勉司校讎益務涵育以就遠志以副殊休可

監登聞檢院楊大全除宗正寺主簿主管官告

院傅伯成除司農寺主簿

十月十四日

監都進奏院

孟浩除國子監主簿

浩閏十月十四日

敕具官某等夫以百畝之宰三年之淹僉言賢勞始有朝蹟而後階升簿正列寺士欲以才自著也斯已艱矣矧爾大全西州之彥而伯成浩又南國之良乎姑懋厥

官以須褒進可

太學正孫元卿除武學博士

閏十月二十五日

敕具官某古者干籥皆學於東序而貍首騶虞又皆樂師所以教國子也爾以文行簡在東膠譽處甚矣推所講明施及右學將見諸生不但習孫吳而已則朕之所以用汝也可

李知己陳景俊並除大理寺丞

十月八日

敕具官某等魯人以淑問獻囚而漢以文無害為獄掾

皆所以重士官也爾知己於今多士為前進而有廉退之稱不幾於魯詩所謂淑問者乎爾景俊於今法家為通才而無少恩之蔽不幾於漢制所謂文無害者乎俾丞棘寺同審刑書庶幾吾民幽枉必達可

國子司業葉適除太府卿淮東總領

十一月十二日

敕具官某昔者仲尼攷定六藝至大學之卒章歸於義利易道深矣亦曰天地大德次及於理財也今宿師數十萬以天下之財贍之不領於大農之經費而居此官

者不知此誼是不重為吾民病乎宜廷臣論建者欲得
賢士大夫使之久任以加惠吾元元也朕覽奏矍然改
圖其人而大臣首以爾適應選擇輟從司成晉長外府
以儒術總戎餉昉於此矣行爾所學奚必多訓可

楊源轉一官

敕具官某爾請昏于戚里將以圖撫仕也方優愍章及
其黨族宜進一官以廣恩意可

楊緯引嫌改知閬州

敕具官某朕不以防禁遇臣下而或自言嫌則亦從欲
以便其私爾紆州組浸有民譽顧以伯氏庀司擁牧抗
章引却易地閭中雖徇爾懷亦足風厲可

主管冲佑觀黃度知婺州

敕具官某言者不狂擇者不明此漢文帝之詔也深厚
寬博庶幾六藝朕甚慕焉日以練官補郡守而爾度方
抗疏論事無所撓且竟舍州組便親養退省爾私豈有
為為之乎若但從欲不强起汝亦異於漢文矣婺越境

錯可以將父便道之官是用命汝其往拊吾民益以民
事之暇強學待問朕豈汝忘哉可

高宗周押馬賞轉官

勅具官某詩不云乎秉心塞淵騄駼三千馬之增減於
此觀人心焉此吾所以設賞典也其進爾秩勸後來可
武節郎提轄製造御前軍器所曹組職事修舉
轉一官

勅具官某以除戎器課勞而增秩非苟以為恩也天下

無事武備易弛有精其能不可不勸可

沈槐胡仲衡呂友直並除大理評事

勅具官某等曰者屢肆大眚圉圉空虛理官具員而已然而擇人以詳刑則不可不謹若爾某者皆由此選也宜及閒暇益務明習以稱朕哀矜庶獄之意可

前知撫州趙彥繩知贛州

勅具官某江右民牧章貢為重爾彥繩以屬籍之秀奮於儒科而臨川治行奏計為最解組來朝適會闕守畀

爾符竹咸曰是宜往其究心以永終譽可

宗正少卿李祥除國子祭酒

十一月二十一日

勅具官某士行莫高於知止廟謨莫急於留賢一舉而
二美附此朕所以用爾祥也以爾議論接於前聞行藏
備於素履見推文行多士攸同粵從樞屬擢貳冑監而
秉心無競陳誼甚高盖旬歲之間亡慮數請以年為解
懷不自安也朕為此風不作深用嘉尚爰疇已試晉長
司成本之諸生以重兩學夫人臣守誼人主尚德是足

以明教化矣可

虞儔知湖州

勅具官某以爾嘗入霜臺持玉節風績甚茂淹恤云久
尚徒勞州組乎夫仁不異遠義不辭難廼茗雪之間自
昔樂土維年不逢民有菜色荒政十二朕靡所愛苟非
其人是將焉寄此朕所以用汝也寓直延閣姑寵爾行
亟圖民庸以計來上可

張宗況張宗愈轉一官與幹官差遣

勅具官某等勸分之令下未有帥先為吾元元輸粟於縣官者而爾以勲閥世臣能奉明詔朕甚嘉之爰進厥秩俾屬外臺非苟為恩將以風厲可

倪思知泉州

勅具官某朕觀周詩至於廷臣徂齊入謝為之作誦勤勤勞苦然後知官人之道焉爾早以英聲穎脫時輩浸即膺仕蔚為國華日者方憇征驂俄而去國顧乃願休祠館不就郡章以若所為豈必待仕而後懃於心歟而

朕自不能忘也維閩山樂土溫陵佳郡成爾素履姑惟
遲次事簡賦寬可踐所學往其欽承益自明試可

鄉貢進士方權輸米補廵功郎

勅某勸分之令下未有帥先為吾元元輸粟於縣官者
而爾嘗預計偕能奉明詔授之初官以厲來者不亦可
乎可

程需輸米特補承信郎

勅某勸分之令下未有帥先為吾元元輸粟於縣官者

而爾能奉明詔是足嘉與官以右選以勸後來可

馬大同特復元官致仕

勅霜臺有請固不可屈於恩泉壤可懷亦不容廢以法
爰棄前咎遂還故官以昭念舊之仁以示勸能之典具
官某信已之學兼人之才粵自少年意已輕於先達浸
更撫仕恥徒事於清談蓋時出其抱負之長而概見於
設施之際修明臬事有發伏擿姦之功論建版曹皆足
用長財之畫肆予初政浹有煩言屬爾沉疴姑從薄責

諒兼忘於寵辱何遽隔於幽明東首拖紳曷慰九原之恨西清持橐尚歆再命之榮可

著作佐郎王奭除著作郎

十二月二十三日

勅具官某雍也仁而不佞仲尼所以第德行之科也爾羣居則寡言旅進則却立不幾乎所謂仁而不佞者歟久游冊府殊無兢心比上著庭見謂直筆於焉序遷未足以究爾能也朕方識之行有簡擢可

秘書丞陳棟除著作佐郎

十一月二十二日

勅具官某載筆東觀極天下之選矣官資崇卑歲月久
近不足論也爾嘗奉大對亞乎襃然之選才長文富不
自銜驚從其所好翱翔著庭以昌令名以就遠器詩不
云乎潛雖伏矣亦孔之炤爾亦喻此指乎可

太常博士邵康除秘書丞

十一月二十三日

勅具官某筮仕學省遂入容臺遂上冊府士而能致身
如此蓋亡幾人也以爾奏名南宮嘗為天下第一種學
績文益務持養次第及此朝無異言往其懋哉以就遠

器可

太常寺主簿劉誠之除太常博士劉孟容除秘

書省正事

十一月二十三日
孟容二十七日

勅具官某朕每講至於春秋一書則聞劉氏之說本朝
經學未能或之先也訪求其家則爾誠之孟容皆世科
第誠之方薄正曲臺雅有譽處而孟容淹恤在外稱者
尤不容口也其以誠之為禮博士而特召孟容實諸冊
府詩不云乎凡周之士不顯亦世世之不顯厥猶翼翼

思皇多士生此王國朕蓋庶幾於此焉可

中書門下省檢正諸房公事兼權刑部侍郎徐

誼除權工部侍郎兼知臨安府

十二月三日

勅商邑翼翼四方之極夫為內史而無尊重難危之勢
非所以覽示海內壯京室也具官某外寬而中剛末詳
而本約能通當今之務而不失古意能得君子之心而
不忿疾于頑也比嘗試對賦奏闡切朕識之久會謀畿
帥而簡之庶僚貳于起部蓋聞冀裏言之助者開羣枉

之門懷危得之情者持自營之計內史不競職此之由
儀圖其人無以易汝是用蔽自朕志度越故常以論思
之班行彈壓之事往其懋哉以振首善可

袁燮除太學正

月十二


勅具官某今周行之士可以為人師者不乏而朕取諸
遠至于一再爾燮亦喻此指乎夫行修于家而未施用
於世名聞於州里而未有著於朝列此人主之所務白
也宜益懋官以副朕不遐遺之意可

添差台州通判呂祖儉除太府寺丞浙東常平

司幹官孟猷除藉田令

猷閏十月三日
祖儉十二日

勅用人之弊其惟泄邇而忘遠乎肆朕嗣服覽示無外
間有遺材取之下國爾祖儉爾猷皆以故家子孫雅有
譽處孝友行於窮約而趣尚不專於科第也徒勞州縣
未究爾能以爾祖儉丞外府猷令藉田其益好修以稱
朕意可



止齋集卷十八